

Vangz lauxsae yienghlawz cungi ndei, hoeng beizheiq miz di gaenj, baengh ceiqheiq guh saeh. Youq ndaw yozyau, Vangz lauxsae hwnj sam aen ban yinghyij, lij dang aen ban banhcujyin ndeu, gunghcoz nyaengq ndaej lumj aen gyangq baenq nei.

Yaucangj naeuz: “Siuj Vangz ha, mwngz gunghcoz nyinhcaen dwgrengz, gou yawj ndaej raen, mwngz haenqrengz bae guh, gihvei dwg hawj boux gaenx guhhong.” Vangz lauxsae lumj nyouq daengz maz nei, gangj: “Yaucangj miz maz saeh couh gangj ba! Gou guh ndaej itdingh guh.” Yaucangj naeuz: “Aen singhgiz baihlaj miz boux yinghyij lauxsae ndeu cingjgyaj bae seng lwnyez, mwngz haeb heuj caiq dingi aen ban dem. Baenz mbouj baenz?” “W! Ndei! Mbouj youqgaenj!” Vangz lauxsae naeuz.

Vangz lauxsae engq nyaengq lo, baenzngoenz hwnjdangz caeuq gaij cozyez, mbouj ndaejhoengq saek di. Gyanghaet cawj rek souh ndeu, caiq cawj di byaek couh gwn ngoenz ndeu. Bouxcoz caen ak, ninz hwnz ndeu, ngoenz daihngeih baez iet hwet, couh lumj duz vaiz iq nei, rengz dangqmaz.

Vangz lauxsae ngoenznaengz anqseiz hwnjban, mbouj cingjgyaj, gaij cozyez caeuq gaujgenj, 4 aen ban yinghyij cingzcik baeznaengz cungi ndaej mingz daih’it. Gyoengq lauxsae cungi naeuz: “Siuj Vangz dwg boux lauxsae ndei ha! Vunz lauxsaed, gyauyoz cingzcik hix mbouj loek! Cungi vunz neix couh wnggai ndaej daezswng!” Vangz lauxsae swdgeij hix gamjdaengz dang lingjdauj aen yozyau hix ndei ha! Bouxcoz ha, miz gihvei



couh lai guh di, duenhlien swdgeij.

“Vangz lauxsae, mwngz gunghcoz nyaengq lai lo, sinhoj lo!” Yaucangj naeuz.

“Mbouj miz maz, lij dingi ndaej!” Vangz lauxsae naeuz.

“Ndei!” Yaucangj haenh.

“Lij miz maz gunghcoz aeu gou bae guh, mwngz couh anbaiz ba!” Vangz lauxsae naeuz.

“Bangunghsiz noix boux gansw ndeu, mwngz daeuj guh ba, hoeng banhcujyin caeuq 4 aen ban yinghyij mwngz lij aeu laebdaeb guh.” Yaucangj naeuz.

“Ndei!” Vangz lauxsae naeuz.

Gij cizcwz bangunghsiz gansw dwg bang lauxsae yaenq swhliu, bang lingjdauj sij vwnzgen, nyaengq seiz baenz ngoenz baenz hwnz, mbouj nyaengq seiz hix youq ndwi. Hoeng gya banhcujyin gunghcoz caeuq 4 aen ban gyauyoz gunghcoz, Vangz lauxsae gaenq dwgrengz lai lo. Vangz lauxsae

gouh gansw le, aenvih cinjbi gaujsi, youh dwg haggeiz satlaeng, aeu yaenq swhliu gig lai, lingjdauj aeu cunggez caizliuh hix lai. Vangz lauxsae nyaengq ndaej mbouj miz seizgan saeg buh cawj haeux.

“Siuj Vangz, mwngz dwgrengz lai dou cungi rox, dou cinjbi daezswng mwngz lo.” Yaucangj naeuz.

“Daezswng gou guh maz?” Vangz lauxsae naeuz.

“Camhseiz mbouj lwnh mwngz nyi. Mwngz haenqrengz bae guh gunghcoz ba!” Yaucangj naeuz.

Gij hong caiq dwgrengz, hix bae guh ha! Yaucangj gaenq gangj gvaq aeu daezswng gou! Vangz lauxsae youq ndawsim swdgeij gag ngeix.

Haggeiz sat hai cunggezvei. Yaucangj naeuz: “Yozyau raeuz aeu daezswng boux lauxsae coz ndeu daeuj dang yozyau lingjdauj. Gou doeg mingzcoh song boux lauxsae hawj caezgya daujlun, yaep he couh

douzbiuq.” Aen sim Vangz lauxsae lumj duzdouq nei diuqetyet. Dauq-daej caj daengz ngoenzneix lo.

Yaucangj doeg mingzcoh Mauz lauxsae caeuq Dwng lauxsae liux, caezgya couh haicij douzbiuq lo. Vangz lauxsae nyinhnaeuz swdgeij dingq loek lo, yawjraen bouxwnq youq gwnz ceij sij mingzcoh mbouj dwg Mauz lauxsae couhdwg Dwng lauxsae, cij rox yenzlaiz mbouj miz swdgeij. Aen sim Vangz lauxsae liengz daengz caekhaex bae. Vihmaz yienghneix ne? Aen gezgoj neix hawj vunz gig doeknaiq.

Ngoenz daihngeih, Vangz lauxsae ra yaucangj naeuz: “Lingjdauj, aenvih gou naengzlig miz hanh, mbouj miz banhfap guh gij hong banhcujyin caeuq 4 aen ban yinghyij, youh guh banhgunghsiz gansw dem, cingjouz aen haggeiz baihlaj cij hwnj song aen ban yinghyij.”

Yaucangj naemj yaep ndeu cij naeuz: “Ndei! Doengzeiq gij yauhgiuz mwngz.”

Vangz lauxsae hozndat dwk yaek byaij ok bangunghsiz yaucangj, dingj-lingz bungz deng fujyaucangj gip dwk byaij haeujdaeuj, fujyaucangj ndaw fwngz gaem aen geb vwnzgen, vwnzgen doek youq gwnz dieg. Vangz lauxsae gungj hwet bae gip hwnjdaeuj, yawjraen vwnzgen biudaez sij dwk: Gij cingjsi baugau gvendaengz doi Vangz XX guh fujyaucangj. Vangz lauxsae seizeix da dumz lo. Aen mingzcoh couhdwg de, hoeng ceiz lo.

Yaucangj naeuz: “Bouxcoz ha, dou caj mwngz baenzvunz di gonq.”

Vangz lauxsae ngaez dwk ndwn youq bakdou, haujlai nanz cij lizhai.

Cingj Laeuj

请 酒

□ Hoz Cuogbliuj / 何宗柳

Youq bien singz miz aen mbanj he heuhguh Mbanjcab, miz 600 lai vunz. Gij vunz Mbanjcab cungj dwg daj seiq mienh bet fueng comz daeuj, dingzlai dwg co ranz youq. Mbanjcab miz boux he heuhguh Hozci, 40 bi, ndaenggiuz haemq gvangq, dwg boux fouz laeuj mbouj baenz donq ndeu. Gij vunzchung Mbanjcab cungj dwg bae ndaw singz guh hong dajcaep, dan Hozci bae sou haizliengz vaih, ngoenz bae laeuj ndaej 80 maenz baedauq.


Mbanjcab mbouj miz vunz rox Hozci daj gyawz daeuj, miz mbouj miz lwmgaex, cij rox de lij miz boh, baizban heuhguh Goengdaih, gaenh 70 bi lo. Bi’ gvaq, raen Hozci baema ranzmbanj mbat he.

Mbanjcab miz vunz guh ndaej ranzmoq、aeubawx、haq lwg、lan rimndwen、lwnyez gauj ndaej dayoz roxnaeuz bizyez le haeuj ndaej danvih、bouxlaux gvaqseiq daengj cungj guhlaeuj. Miz haujlai vunz naeuz: “Cingj youh gyangz, mbouj cingj youh raemhfangz. Nanz gangj ha.” Moix mbat vunzmbanj cingj laeuj cungj noix mbouj ndaej heuh Hozci. Hozci yinx

laeuj youh gwn ndaej, byawz cingj de cungj bae gwn. Mizseiz, youq henz daizlaeuj boux vunzseng roxnaj Hozci, gvaqlaeng cingj laeuj hix heuh de. Ndigah, youq aen singz gaenh Mbanjcab miz geijlai aen diemqlaeuj, gizlawz haeuxbyaek ndei gwn, Hozci cungj rox. Gak aen diemq bouxcawj hix roxnaj Hozci caez. Hozci daeuj Mbanjcab youq le, ngoenzlawz bae gwn laeuj, gwn maz laeuj, de cungj geiq youq bonj sawbough he.

Bineix, miz ngoenz he, Hozci bae gwn laeujgyaeu goenggeq he rim 80 bi. Dauq ranz le, de dawz bonj bitgeiq daeuj yawj, baez yawj, couh doeksaet. De suenq ok gaenh 4 bi daeuj, moix bi cingh bae gwn laeuj couh yungh bae 8000 lai maenz. De sim gig nyap: Yienghneix roengzbae nanz guh bw. Hai, nanz aeu ndaej dauq ha. Hei, bohvunz 80 bi cingj laeuj, boh gou rim 70 bi hix ndaej guhlaeuj lo…… Ngeix daengz neix, de sikhaek dawz soujgih okdaeuj dwk.

Ngoenzhaenx, boh Hozci rim 70 hopbi, Hozci cingj laeuj lo. Gij vunz gaxgonq guh laeuj cingj de cienzbouh cingj daeuj. Boh de naengh youq ndaw



ding aen diemqlaeuj he, caencik baengzyoux daeuj le, cungj hoh de: “Fuk lumj daihhaij, gyaeu lumj goengqbya!” Gangj sat, couh gyau hoengzbau hawj Hozci lo.

Daihgya gwn ndaej caetcaet betbet seiz, sawqmw h soujgih boh Hozci naeng lo, miz vunz ra de. De heuh boux ra daeuj ndaw diemq nyaemq laeuj gonq. Yaep he, boux ra daeuj daengz ndaw diemq. De baez raen boh Hozci couh naeuz: “Goengseiq, byawz cingj mwngz daeuj neix gwn laeuj?” Hozci siengj lanz hix mbouj ndaej lo. Caezgya dingq le gig doeksaet: “A? Neix mbouj

dwg Goengdaih? Mbouj dwg boh Hozci?” Boux haenx naeuz: “Mbouj dwg bw, Goengdaih boh Hozci, bi-gvaq gvaqseiq lo.” Caezgya dingq le, bouxboux caengz yawj Hozci. Hozci naj nding bak aj ngoemxngod, song fwngz dawz aen daeh cang hoengzbau ndaetndaet bae. Caen dwg: Ciq vunz guh laeujgyaeu, cienz gwn laeuj ndaej ma, saetlaex youh saetgah, mbouj miz naj raen vunz.

Gvaqlaeng, Hozci baez bungz raen “boh” de, naj gag nyaenq, daengx ndang mbouj cwxcaih, gyae raen gyae bienq deuz. Daihgya caiq hix mbouj cingj Hozci bae gwn laeuj lo.